

Bosna i Hercegovina
Federacija Bosne i Hercegovine
Federalno ministarstvo energije, rudarstva i industrije
Mostar

**Program
utroška sredstava Trajnog revolving fonda kod Union banke d.d.
Sarajevo, Federalnog ministarstva energije, rudarstva i industrije za
dugoročno finansiranje projekata putem dodjele kredita za 2016.
godinu**

Mostar, januar 2016. godine

1. UVOD

Pitanje konkurentnosti je izuzetno važno s obzirom na veoma nizak životni standard i visok vanjskotrgovinski deficit Bosne i Hercegovine (niska pokrivenost uvoza izvozom od oko 60% za 2015. godinu). Zbog toga su hitno potrebne investicije u nove kapacitete da bi se povećala produktivnost a samim tim i konkurentnost bosansko hercegovačke privrede na tržištu. Iz tog razloga investicije, kao jedan od ciljeva privrednog razvoja koje je Vlada Federacije Bosne i Hercegovine postavila sebi kao zadatak, zauzimaju posebno mjesto i imaju veliku važnost kako za budući razvoj zemlje, tako i za restruktuisanje i modernizaciju privrede u cjelini. Trendovi u razvijenim svjetskim ekonomijama ukazuju na to da su ulaganja u tehnološki napredak i stručno osposobljavanje, generatori rasta koji uzrokuju stalne promjene na putu razvoja konkurentnosti i podsticanja investicija.

Prerađivačka industrija Federacije Bosne i Hercegovine, kao najznačajniji dio privrede, se u svom razvoju susreće s brojnim ograničenjima, kao što su: manjak stručnih kadrova, zastarjelost opreme i nedostatak programskih rješenja. Privredna društva u Federaciji Bosne i Hercegovine uglavnom koriste tradicionalnu tehnologiju te zaostaju za primjenom savremenih i inovativnih tehnoloških rješenja, što umanjuje njihovu konkurentnost. Unapređenje proizvodnih procesa, razvoj novih proizvoda i pronalaženje novih tržišta doprinosi tržišnoj konkurentnosti domaćih proizvoda.

2. PRAVNI OSNOV

- Projekat: Razvoj industrijske politike u Federaciji Bosne i Hercegovine, („Službene novine Federacije BiH“, broj 40/10);
- Akcioni plan za realizaciju projekta „Razvoj industrijske politike u Federaciji BiH“ 2016-2019 (Zaključak V. broj 91/2016 od 14.01.2016. godine);
- Strategija razvoja namjenske industrije u periodu 2012-2022. godine;
- Akcioni plan koji prati izvršenje Strategije razvoja namjenske industrije u periodu 2012-2022. godine (Zaključak V. broj 1068/2012 od 26.07.2012. godine)
- Strategija razvoja industrije tekstila, odjeće, kože i obuće u Federaciji Bosne i Hercegovine za period 2013-2023. godine ("Službene novine Federacije BiH ", broj 65/13);
- Akcioni plan 2013-2018. godine za realizaciju Strategije razvoja industrije tekstila, odjeće, kože i obuće u Federaciji Bosne i Hercegovine za period 2013-2023. godine (Zaključak V. broj 1242/2013 od 31.10.2013. godine).

3. ZAKONODAVNI OKVIR PROVEDBE PROGRAMA

- Odluka o davanju saglasnosti Federalnom ministarstvu energije, rudarstva i industrije za uspostavu Trajnog revolving fonda kod Union banke d.d. Sarajevo za dugoročno finansiranje projekata putem dodjele kredita – Trajni revolving fond („Službene novine Federacije BiH“, br. 27/14, 91/14, 106/14 i 3/15);
- Budžet Federacije Bosne i Hercegovine za 2016. godinu („Službene novine Federacije BiH“, broj 102/15);

- Zakon o izvršavanju Budžeta Federacije Bosne i Hercegovine za 2016. godinu („Službene novine Federacije Bosne i Hercegovine“, broj 102/15);
- Zakon o sistemu državne pomoći u Bosni i Hercegovini („Službeni glasnik BiH“, broj 10/12) i
- Uredba o namjeni, kriterijima i uslovima za dodjelu državne pomoći u Federaciji Bosne i Hercegovine („Službene novine Federacije BiH“, broj 99/13).

4. CILJ PROGRAMA

Cilj Programa utroška sredstava Trajnog revolving fonda kod Union banke d.d. Sarajevo, Federalnog ministarstva energije, rudarstva i industrije za dugoročno finansiranje projekata putem dodjele kredita za 2016. godinu (u daljem tekstu: Program), je stvoriti novo, povoljnije poslovno i investicijsko okruženje kao i poboljšanje okvirnih uslova za poslovanje u Federaciji Bosne i Hercegovine kroz realizaciju strateških ciljeva koji su usvojeni u dokumentu Razvoj industrijske politike u Federaciji Bosne i Hercegovine, Strategija razvoja namjenske industrije i Strategija razvoja industrije, tekstila, odjeće, kože i obuće u Federaciji Bosne i Hercegovine. Postizanjem konkurentnije privrede očekuje se otvaranje novih radnih mjesta i poboljšanje produktivnosti privrednih subjekata. Provođenjem pomenutih strateških ciljeva, pridonjeti će se privrednom razvoju zemlje u skladu sa načelima održivog razvoja, kroz stvaranje uslova koji će omogućiti jačanje konkurentnosti domaće industrije i realizaciju vlastitih razvojnih potencijala. Putem inovacija i novih tehnologija povećava se konkurentnost privrede te se stvara privreda koja se zasniva na proizvodima više vrijednosti.

U skladu sa tim, očekivani efekti Programa su:

- više radnih mjesta,
- rast indeksa industrijske proizvodnje za sektore prerađivačke industrije,
- nove napredne tehnologije i tehnološki postupci, kao i unapređenje postojećih tehnologija i tehnoloških postupaka i reinženjeringa,
- razvoj novih proizvoda i materijala, proizvodnih procesa ili usluga sa većom dodatnom vrijednosti,
- uspostavljanje sistema kvalitete (CE znak, ISO standardi i drugo),
- povećanje konkurentnosti,
- porast prometa i
- poboljšanje općeg privrednog stanja.

5. NAMJENA POZAJMLJENIH SREDSTAVA

Ovaj Program je prvenstveno namijenjen privrednim društvima osnovanim po Zakonu o privrednim društvima („Službene novine Federacije BiH“, broj 81/15) s ciljem povećanja broja zaposlenih kroz provođenje aktivnosti ulaganja u modernizaciju i nabavku opreme, izgradnju novih proizvodnih objekata i modernizaciju tehnoloških procesa.

Na osnovu ovog Programa pozajmiti će se sredstva sljedećim sektorima industrijske proizvodnje:

- Metalna, elektro i automobilska industrija,

- Industrija građevinskog materijala i nemetala,
- Drvna, papirna i grafička industrija,
- Proizvodnja tekstila, odjeće, kože i obuće,
- Hemijska i farmaceutska industrija i industrija gume i plastike i
- Namjenska industrija.

Pozajmljivanje sredstava vrši se u cilju:

- značajnog poboljšanja i modernizacije proizvodnje postojećih proizvoda, proizvodnih procesa koji daju proizvode s većom dodatnom vrijednosti,
- širenja postojeće proizvodnje i izgradnju novih proizvodnih kapaciteta,
- izgradnje proizvodnih objekata koji podrazumijeva ulaganje u nove ili rekonstrukciju, adaptaciju i dogradnju postojećih objekata i postrojenja, te kupovinu novih proizvodnih hala, sa pripadajućom infrastrukturom i opremom ili bez nje, a koje su usko vezane uz proizvodnju,
- nabavke novih tehnologija koje doprinose unapređenju djelatnosti privrednog društva (mašine, postrojenja i oprema za proizvodnju, mjerni i kontrolni uređaji i instrumenti),
- nabavke industrijskog znanja (know-how), posebnih znanja i vještina, kao i nabavke informatičke opreme usmjerene ka proizvodnji,
- uvođenja validnog CE znaka,
- uvođenja Sistema kvaliteta u skladu sa standardima (serija ISO standarda, sistemima upravljanja zaštitom zdravlja i bezbjednošću na radu, potrebnih licenci za obavljanje proizvodne djelatnosti i sl.),
- pokretanja značajnijih aktivnosti zasnovanih na promjenama sveukupnih proizvodnih procesa i stanja postojeće poslovne djelatnosti društva (reinžinjerin) i
- ulaganja u razvoj i istraživanje novih proizvoda i materijala, kao i jačanje marketinških aktivnosti.

Pod ulaganjem se smatra ulaganje u materijalnu ili nematerijalnu imovinu koja se odnosi na širenje privrednog društva kroz razvoj novih proizvoda ili osnovnu promjenu u proizvodnom procesu postojećeg privrednog društva kao i aktivnosti koje su započete najkasnije godinu dana (12 mjeseci) unazad od dana podnošenja zahtjeva za dodjelu sredstava ovog Programa. Ponude, predračuni ili ugovori ne smiju biti od dobavljača ili izvođača koji je povezana osoba sa podnositeljem zahtjeva za dodjelu sredstava po Programu.

Povezanom osobom iz prethodnog stava se smatra društvo:

- koje ima istog vlasnika i/ili suvlasnika kao podnositelj zahtjeva,
- kojem je podnositelj zahtjeva vlasnik/suvlasnik,
- koje je vlasnik/suvlasnik podnositelja zahtjeva,
- čiji je vlasnik/suvlasnik bračni drug ili lice koje živi u istom domaćinstvu sa vlasnikom/suvlasnikom podnositelja zahtjeva i
- koje ima zajedničke članove nadzornog odbora i/ili uprave sa podnositeljem zahtjeva.

Neprihvatljivim troškovima i ulaganjima po ovom Programu, smatraju se:

- kupovina potrošne robe, sirovina, repromaterijala i rezervnih dijelova,
- troškovi carinjenja, prevoza i stavljanja u pogon kupljenje opreme,
- troškovi edukacije,
- troškovi laboratorijskih testova,
- troškovi različitih studija i mišljenja i
- troškovi PDV-a.

6. KRITERIJI ZA IZBOR KORISNIKA SREDSTAVA ZA POZAJMLJIVANJE

Kreditna sredstva se dodjeljuju u skladu sa Zakonom o sistemu državne pomoći („Službene novine Federacije BiH“, broj 10/12) i Uredbom o namjeni, kriterijima i uslovima za dodjelu državne pomoći u Federaciji BiH („Službene novine Federacije BiH“, broj 99/13), odnosno po pravilima za dodjelu državne pomoći male vrijednosti (de minimis državna pomoć), kojima je definisano da se de minimis državna pomoć može dodijeliti pojedinačnom privrednom društvu u visini do 200.000 €, u bilo kom periodu u toku tri uzastopne fiskalne godine.

Državnu pomoć po ovom Programu čini samo iznos kamate koji nastaje kao razlika između referentne kamatne stope i stope po kojoj je odobren kredit, odnosno koja je definisana Programom. De minimis državna pomoć ne može se dodijeliti između ostalog privrednim društvima u teškoćama i za podsticanje izvoza.

Pozajmljivanje sredstava po ovom Programu znači kredit obezbijeđen putem Union banke d.d. Sarajevo (u daljem tekstu: Banka), regulisan ugovorom o kreditu, s odgodom plaćanja („grace“ periodom) do 12 mjeseci.

Korisnici sredstava po ovom Programu mogu biti privredna društva sa sjedištem u Federaciji Bosne i Hercegovine čija je primarna djelatnost definisana djelatnostima proizvodnje u sektorima navedenim u tački 5. ovoga Programa, te da zapošljavaju najmanje 20 zaposlenika kao i privredna društva sa sjedištem u Federaciji Bosne i Hercegovine koja na teritoriji Republike Srpske otvaraju ispostave, podružnice ili poslovne jedinice.

Privredna društva koja apliciraju za dodjelu sredstava trebaju imati slobodan kolateral kako bi se Federalno ministarstvo energije, rudarstva i industrije (u daljem tekstu: Ministarstvo) u C-teretnom listu , moglo upisati, isključivo, kao založni povjerilac I reda ili u registru zaloga kao založni povjerilac. Korisnici sredstava po ovom Programu mogu biti samo ona privredna društva koja su prema mišljenju Banke o bonitetu klijenta ocijenjena sa „pozitivno“ i „pozitivno sa napomenom“. (Napomena: ne uzimaju se u razmatranje privredna društva koja su prema mišljenju Banke o bonitetu klijenta ocijenjena sa „negativno“, „negativno sa napomenom“ i „bez mišljenja“).

Ukoliko nakon provedene procedure ocjene rizika od strane Banke postoji više aplikacija sa zahtjevima koji premašuju iznos koji je naveden u Programu i Javnom pozivu, uzimat će se u obzir sljedeće:

1. broj novozaposlenih osoba; (privredno društvo koje u zahtjevu za dodjelu sredstava navede da će odobrenjem kreditnih sredstava zaposliti veći broj osoba ima prednost nad drugim privrednim društvom);

2. broj zaposlenih povratnika (privredno društvo koje traži sredstva za ispostavu, podružnicu ili poslovnu jedinicu sa sjedištem u Republici Srpskoj, ima prednost u odnosu na privredno društvo koje također traži sredstva za ispostavu, podružnicu ili poslovnu jedinicu sa sjedištem u Republici Srpskoj, onda kada ima veći broj zaposlenih povratnika što se dokazuje ovjerenom i potpisanom izjavom od strane ovlaštenog lica tog privrednog društva i to samo u slučaju kada su zadovoljeni kriteriji po Programu i Javnom pozivu i kada je iznos sredstava za dodjelu nedostatan za prihvatanje svih formalno ispravnih zahtjeva).
3. broj zaposlenih; (privredno društvo koje u zahtjevu za dodjelu sredstava ima veći broj zaposlenih, ima prednost nad privrednim društvom koje ima manji broj zaposlenih samo u slučaju kada su zadovoljeni kriteriji po Programu i Javnom pozivu i kada je iznos sredstava za dodjelu nedostatan za prihvatanje zahtjeva svih privrednih društava koja su podnijela zahtjev za dodjelu istih);
4. visina investicije; (privredno društvo koje u zahtjevu za dodjelu sredstava potražuje veći iznos sredstava koji je u skladu sa Programom i Javnim pozivom, ima prednost nad privrednim društvom koje potražuje manji iznos sredstava onda kada su im isti osnovni kriteriji zadovoljeni i kada je iznos sredstava za dodjelu nedostatan za prihvatanje zahtjeva svih privrednih društava koja su podnijela zahtjev za dodjelu istih);
5. ulog vlastitog kapitala u investiciji; (privredno društvo koje u zahtjevu za dodjelu sredstava kao vlastiti ulog kapitala, u navedenoj investiciji, navede iznos koji je veći od iznosa uloga vlastitog kapitala u investiciji drugog privrednog društva, ima prednost samo pod uslovom da privredna društva koja su aplicirala, zadovoljavaju osnovne kriterije iz Programa i Javnog poziva i kada je iznos sredstava za dodjelu nedostatan za prihvatanje zahtjeva svih privrednih društava koja su podnijela zahtjev za dodjelu istih);
6. dužina poslovanja; (privredno društvo koje uspješno posluje dugi niz godina ima prednost nad drugim privrednim društvom samo ukoliko iznos traženih sredstava za sve aplikante prelazi iznos naznačen u Programu i Javnom pozivu);

Korisnici ne mogu biti privredna društva:

1. u stečaju ili u postupku likvidacije,
2. koja imaju nepodmiren dug prema federalnim i državnim institucijama, osim ako isti nije reprogramiran važećim dokumentom,
3. koji ne ispunjavaju ili neuredno ispunjavaju svoje obaveze po prethodno odobrenim kreditima dodijeljenim od Ministarstva putem Banke,
4. koja ne ispunjavaju uslove za otvaranje transakcijskog računa kod Banke,
5. koja bez prekida posluju kraće od 6 mjeseci i/ili ne posjeduju zvanične finansijske izvještaje,

6. koja su bila korisnici kredita od strane Ministarstva po Programima Trajnog revolving fonda u prethodne dvije godine (2014. i 2015. godina),
7. koja imaju iskazan gubitak iznad visine kapitala prema posljednjem zvaničnom bilansu stanja,
8. čiji kapital prema posljednjem zvaničnom bilansu stanja ima vrijednost nižu od iznosa traženog kredita i
9. koja prema CRK izvještaju Centralne Banke Bosne i Hercegovine imaju tekuće plasmane u finansijskim institucijama u kategoriji lošijoj od B (osim u slučaju da obezbijede dokaz o urednom izmirivanju obaveza).

7. SREDSTVA PREDVIĐENA ZA POZAJMLJIVANJE

Sredstva predviđena za pozajmljivanje po ovom Programu, čine:

- saldo sredstava zatečenih na računu u Union banci d.d. Sarajevo na dan 31.12.2015. godine, u iznosu od 4.900.050,96 KM, umanjen za iznos obaveza iz 2014. godine u iznosu od 1.795.000,00 KM, što daje iznos od 3.105.050,96 KM,
- sredstva koja će biti realocirana na račun Trajnog revolving fonda u Union banci d.d. Sarajevo iz 2014. i 2015. budžetske godine, do 31.01.2016. godine, u iznosu od 10.100.000,00 KM,
- odobrena sredstva po Budžetu Federacije Bosne i Hercegovine za 2016. godinu, u iznosu od 8.400.000,00 KM.

Ukupan iznos sredstava predviđenih za pozajmljivanje po ovom Programu će iznositi 21.605.050,96 KM, umanjen za iznos sredstava koji će biti dodijeljen po Programu za 2015. godinu u iznosu od 8.732.247,00 KM, kao i za iznos sredstava koji će biti eventualno dodijeljen privrednim društvima čija se dokumentacija nalazi u proceduri ocjene, uvećan za sredstva koja će se alocirati na račun Trajnog revolving fonda u Union banci d.d. Sarajevo od povrata dodijeljenih kreditnih sredstava u prethodnom periodu (preko Razvojne banke Federacije Bosne i Hercegovine i preko Union banke d.d. Sarajevo).

Iznos raspoloživih sredstava za dodjelu kredita u 2016. godini, iznositi će minimalno 8.400.000,00 KM.

Navedena sredstva su kreditnog karaktera, sa:

- odgodom plaćanja („grace“ periodom) do 12 mjeseci,
- godišnjom kamatnom stopom u visini 0,9% i
- naknadom za obradu kredita - jednokratno u visini 0,6%.

Naprijed navedene troškove snosi korisnik sredstava. Kamata predstavlja prihod komitenta, a naknada predstavlja prihod Banke.

Naplaćena, redovna, kamata u konačnici predstavlja naknadu Banci za komisioni posao.

Naknada za obradu kredita se plaća unaprijed iz odobrenih kreditnih sredstava korisnika u visini 0,6%.

Dodijeljena sredstva korisnici vraćaju u minimalno 24, a maksimalno u 60 jednakih mjesečnih anuiteta. U broj anuiteta se ne uračunava „grace“ period. Početak povrata kredita, dinamika vraćanja, kao i drugi bitni elementi kredita bit će definisani ugovorom.

Dodijeljena sredstva isključivo će se isplaćivati na račune korisnika kredita kod Banke, čime će se omogućiti i kontrola utroška dodijeljenih sredstava Programa.

Sredstva za provođenje Programa odobravati će se u visini novčanih sredstava, na način kako je to dato u Tabeli 1.

Tabela 1

Visina dodijeljenih sredstava u KM	Odgoda plaćanja (grace period) u mjesecima do	Broj anuiteta (mjesečnih) vraćanja sredstava
100.000,00 – 800.000,00	12	24-60

Kreditna sredstva moraju biti obezbijeđena minimalno:

- mjenicama Korisnika sredstava (dužnika) i mjenicama vlasnika Korisnika sredstava (u slučaju da 50% ili više vlasništva pripada jednom licu, osim za preduzeća u većinskom državnom vlasništvu) i
- založnim pravom na nekretnine ili kombinacijom založnog prava na nekretninama i zaloga na pokretnim stvarima – opremu, odgovarajuće vrijednosti ustanovljene na osnovu procjene stalnog sudskog vještaka odgovarajuće struke (definisano u nastavku).

Vrijednost nekretnina koje se uzimaju kao kolateral mora biti minimalno u omjeru 1,5:1 u odnosu na iznos kredita, osim ukoliko se radi o kombinaciji založnog prava na nekretninama i zaloga na pokretnim stvarima.

Ukoliko se radi o kombinaciji založnog prava na nekretnine i zaloga na pokretne stvari, ukupna vrijednost kolaterala mora biti minimalno 2:1 u odnosu na iznos kredita uz uslov da vrijednost nekretnina mora biti minimalno 1,25:1 u odnosu na iznos kredita.

Ukoliko je namjena kredita nabavka opreme odnosno pokretnih stvari, obavezno je da se iste zalažu kao dodatni kolateral uz obavezni kolateral (vrijednost dodatnog kolaterala ne ulazi u gore definisane omjere vrijednosti kolaterala i iznosa kredita).

8. TRAJANJE PROGRAMA

Program traje do utroška sredstava, odnosno do dana usvajanja Budžeta Federacije Bosne i Hercegovine za 2017. godinu.

Aktivnosti vezane za donošenje i realizaciju Odluka i Rješenja o dodjeli kreditnih sredstava za privredna društva, a koje su započete sa Programom za 2016. godinu, traju do konačne realizacije istih.

9. TIJELA NADLEŽNA ZA PROVOĐENJE PROGRAMA

Tijela nadležna za provođenje i nadzor nad namjenskim korištenjem sredstava po ovom Programu su Ministarstvo, Federalno ministarstvo finansija/financija i Banka,

svako u okviru svoje nadležnosti, u skladu s Ugovorom o komisionim poslovima zaključenim između Ministarstva i Banke.

Ministarstvo ima pravo uvida i kontrole u postupku provođenja odobrene investicije na lokaciji korisnika.

U svrhu kontrole namjenskog korištenja dodijeljenih sredstava korisnik je dužan provesti odobrenu investiciju u cijelosti, u skladu sa donesenim Rješenjem i potpisanim Ugovorom, te dostaviti Ministarstvu Izvještaj o provođenju odobrene investicije sa prikazom očekivanih učinaka investicije, i to najkasnije 6 mjeseci nakon dodjele sredstava.

10. PROVOĐENJE PROGRAMA

Sredstva se dodjeljuju na osnovu raspisanoga Javnog poziva u kojem će se jasno definisati uslovi za prijavu na Javni poziv, kriteriji za vrednovanje zahtjeva privrednih društava, način razmatranja prijava kao i spisak potrebne dokumentacije koju je potrebno priložiti uz zahtjev za dodjelu sredstava, a prema sljedećem rasporedu:

- Dokumentacija na obrascima Banke (preuzeti sa web stranice Union banke d.d. Sarajevo: www.unionbank.ba):
 - Zahtjev za kredit,
 - Karton deponovanih potpisa,
 - Popunjen upitnik o povezanim licima,
 - Saglasnost za pristup podacima iz centralnog registra kredita,
 - Izjava ovlaštenoga lica o nepostojanju računa nad kojim je određena mjera zabrane raspolaganja novčanim sredstvima,
 - Pregled postojećih kreditnih obaveza s informacijama o namjeni i obezbjeđenju i
 - Poslovni plan koji uključuje i plan investiranja s efektima utroška sredstava (ukoliko se poslovnim planom proiciraju prihodi koji su veći u odnosu na prethodnu godinu i/ili prosjek prethodne 3 godine za više od 10%, potrebno je da proicirani prihodi i njihova izvjesnost bude adekvatno dokumentovana i precizno obrazložena).

- Dokumentacija potencijalnih Korisnika kredita:
 1. Rješenje o upisu u sudski registar sa svim izmjenama i dopunama,
 2. Aktuelni izvod iz u sudskog registra (ne stariji od 30 dana),
 3. Statut i odluka/akt o osnivanju,
 4. Uvjerenje o poreznoj registraciji kod Porezne uprave – ID broj,
 5. Uvjerenje o registraciji obveznika poreza na dodatnu vrijednost – PDV broj,
 6. Obavještenje nadležnog zavoda za statistiku o razvrstavanju prema djelatnosti,
 7. Uvjerenja nadležne organizacione jedinice Porezne uprave/UIO da nema neizmirenih obaveza po osnovu javnih prihoda,
 8. Identifikacioni dokument osnivača ukoliko se radi o dioničkom društvu,
 9. Lične karte i CIPS potvrde o prebivalištu lica ovlaštenih za zastupanje,
 10. Zvanični finansijski izvještaji za posljednje tri godine (podrazumijeva godišnje i polugodišnje finansijske izvještaje - ukoliko je društvo obavezno vršiti prijavu polugodišnjih izvještaja); ukoliko je privredno društvo osnovano u periodu koji

- je kraći od tri godine, potrebno je dostaviti finansijske izvještaje za cjelokupni period poslovanja,
11. Analitički bruto bilans,
 12. Pregled potraživanja od kupaca,
 13. Pregled obaveza prema dobavljačima,
 14. Dokumentacija u vezi sa imovinom koja se nudi kao obezbjeđenje kredita:
 - a. procjena sudskog vještaka (ne starija od šest mjeseci),
 - b. ZK izvadak i kopija katastarskog plana/posjedovnog lista sa identifikacijom parcela novog i starog premjera (ne stariji od 30 dana) i/ili dokumentacija kojom se dokazuje vlasništvo nad pokretnim stvarima i izvod iz registra zalogaNapomena: provjeru izvoda iz registra zaloga će vršiti Banka i naplatiti taksu prilikom realizacije kredita,
 15. Spisak zaposlenika iz matične evidencije aktivnih osiguranika, izdat od strane nadležne službe ne stariji od 30 dana od dana podnošenja zahtjeva (min. 20 zaposlenika),
 16. Ovjerena i potpisana izjava od strane ovlaštenog lica o planiranom broju novozaposlenih radnika u periodu do jedne godine po potpisivanju ugovora o dodjeli kreditnih sredstava, koji će biti zadržani u radnom odnosu najmanje tri godine,
 17. Izjava ovlaštenog lica da privredno društvo u zadnje dvije budžetske godine, 2014. i 2015. godina, nije bilo korisnik kreditnih sredstava od strane Federalnog ministarstva energije, rudarstva i industrije,
 18. Ovjerena i potpisana izjava od strane ovlaštenog lica o broju zaposlenih povratnika (ukoliko se zahtjev za dodjelu sredstava odnosi na ispostave, podružnice ili poslovne jedinice sa sjedištem u Republici Srpskoj),
 19. Izjava kojom privredno društvo dokazuje da u prethodne tri fiskalne godine nije bilo korisnik grant ili kreditnih sredstava, a ukoliko jeste, izjavom treba obavijestiti Ministarstvo o drugim vrstama državne pomoći koje je dobilo u prethodnom trogodišnjem fiskalnom periodu od svih nivoa vlasti (grant sredstva, kreditna sredstva sa subvencionisanom kamatnom stopom, garancije itd.), i
 20. Ostala dokumentacija u skladu sa zahtjevima Banke i/ili Ministarstva, kao i dokumenti za koje klijent smatra da su interesantni za Banku.

Napomena:

- svi traženi dokumenti, od rednog broja 1. do 20., trebaju biti originali ili ovjerene kopije ne starije od 30 dana od dana podnošenja kreditnog zahtjeva;
- obrazac izjave pod rednim brojem 19., može se preuzeti sa web stranice Ministarstva (www.fmeri.gov.ba);
- dokumentaciju pod rednim brojevima 11., 12. i 13. u prethodnom stavu treba obezbijediti sa:
 - danom dostavljenih posljednjih zvaničnih finansijskih izvještaja i
 - posljednjim danom prethodnog mjeseca u odnosu na dan podnošenja zahtjeva za kredit.

Pismeni zahtjev za dodjelu kreditnih sredstava s ostalom potrebnom dokumentacijom po Javnom pozivu, uvezanom i poredanom po tačkama Javnog poziva, podnosi se Ministarstvu na memorandumu društva, potpisan od strane ovlaštenog lica sa

preciznom namjenom sredstava kredita, iznosom i rokovima otplate kredita, te sa naznakom iz kojeg se industrijskog sektora traže sredstva (Metalna, elektro i automobilska industrija; Industrija građevinskog materijala i nemetala; Drvna, papirna i grafička industrija; Proizvodnja tekstila, odjeće kože i obuće; Hemijska i farmaceutska industrija i industrije gume i plastike; Namjenska industrija).

Podnositelj može podnijeti u toku važeće, budžetske godine više od jednog zahtjeva, ukoliko mu po prethodnom zahtjevu nisu odobrena kreditna sredstva.

Zahtjevi za kreditna sredstva koji su veći od maksimalnog predviđenog iznosa iz ovog Programa, smatrati će se formalno neispravnim i neće se uzeti u razmatranje.

U cilju provođenja postupka dodjele sredstava na osnovu podnesenih zahtjeva, federalni ministar energije, rudarstva i industrije, Rješenjem, imenuje Komisiju za utvrđivanje prijedloga sa rang listom korisnika dijela sredstava utvrđenih u razdjelu 17. Budžeta Federacije Bosne i Hercegovine za 2016. godinu Federalnom ministarstvu energije, rudarstva i industrije „Izdaci za finansijsku imovinu–Ostala domaća pozajmljivanja–Trajni revolving fond (u daljem tekstu:Komisija), koja se sastoji od tri člana iz Ministarstva.

Radu Komisije mogu prisustvovati predstavnici Udruženja poslodavaca Federacije Bosne i Hercegovine, sindikata Bosne i Hercegovine i Banke, ukoliko predsjednik Komisije to ocijeni za potrebnim.

Postupak dodjele kreditnih sredstava predstavlja sveobuhvatni postupak odabira zahtjeva za dodjelu sredstava i sastoji se od sljedećih faza:

- 1) Zaprimanje zahtjeva
- 2) Administrativna provjera formalne ispravnosti dostavljenih zahtjeva
- 3) Ocjena o bonitetu klijenta i pravno mišljenje o projektu
- 4) Odluka o davanju prethodne saglasnosti na prijedlog Rješenja o dodjeli kreditnih sredstava sa dostavljenim mišljenjima od strane relevantnih institucija, dostavlja se Vladi Federacije BiH na odlučivanje i objavljuje u „Službenim novinama Federacije BiH“ kao i na web stranici Ministarstva
- 5) Donošenje Rješenja o dodjeli kreditnih sredstava uz objavu iste u „Službenim novinama Federacije BiH“
- 6) Potpisivanje Ugovora o dodjeli kreditnih sredstava

Zahtjevi za dodjelu kreditnih sredstava se u fazama 1 i 2 obrađuju prema datumu zaprimanja, a u slijedeće faze se upućuju prema datumu i vremenu okončanja obrade za pojedine faze.

Neuspješni podnosioci zahtjeva za dodjelu kreditnih sredstava po svim fazama će biti obaviješteni u pisanom obliku, uz navode razloga za odbijanje.

Javni poziv po ovom Programu biti će raspisan nakon usvajanja Programa od strane Vlade Federacije Bosne i Hercegovine i bit će otvoren do utroška sredstava, a najkasnije do dana usvajanja Budžeta Federacije Bosne i Hercegovine za 2017. godinu.

Komisija će najmanje jednom mjesečno, a po potrebi ili prema procjeni predsjednika Komisije i više puta mjesečno, vršiti pregled pristiglih zahtjeva za dodjelu sredstava, s ciljem utvrđivanja formalne ispravnosti istih. Komisija će pri izboru korisnika poštovati osnovne principe kao što su jednako postupanje, nediskriminacija, povjerljivost i transparentnost. Nakon svakog sastanka, Komisija sačinjava zapisnik. Ukoliko u toku mjeseca ne bude zaprimljen ni jedan zahtjev Komisija će to konstatovati zapisnikom. Komisija može zatražiti od privrednog društva dodatna pojašnjenja i dodatnu dokumentaciju te isto zapisnički konstatovati.

Listu formalno ispravnih zahtjeva za dodjelu sredstava i usklađenih sa uslovima definisanih Programom, sa pripadajućim priložima, Komisija će na službenom memorandumu Ministarstva dostaviti Banci na ocjenu rizika, nakon svakog održanog sastanka Komisije.

Nakon što Ministarstvu bude dostavljeno mišljenje Banke o bonitetu podnosilaca zahtjeva, Komisija će na osnovu Programom utvrđenih kriterija i svojih internih akata, sačiniti Prijedlog sa rang listom pojedinačnih zahtjeva i sa predloženim iznosima novčanih sredstava za dodjelu dostaviti ih federalnom ministru energije, rudarstva i industrije na ocjenu.

Federalni ministar energije, rudarstva i industrije će, na osnovu dostavljenog Prijedloga rang liste pojedinačnih projekata sa dodijeljenim iznosima novčanih sredstava, uputiti Prijedlog odluke Vladi Federacije Bosne i Hercegovine o davanju prethodne saglasnosti na pojedinačna rješenja korisnika kreditnih sredstava.

Banka će na osnovu donesenih i objavljenih odluka i rješenja vršiti ugovaranje sa korisnicima sredstava u skladu sa bankarskom procedurom.

11. POSLOVNI ODNOS IZMEĐU FEDERALNOG MINISTARSTVA ENERGIJE, RUDARSTVA I INDUSTRIJE I UNION BANKE D.D. SARAJEVO

Ministarstvo i Banka svoje poslovne odnose uredili su Ugovorom o komisionim poslovima broj: 07-14-564-1/14 zaključen dana 15.04.2014. godine, Aneksom I Ugovora o komisionim poslovima broj 07-14-564-1-1/14 zaključen dana 22.12.2014. godine i Ugovorom o uspostavljanju Trajnog revolving fonda broj: 07-14-564/14 zaključen dana 15.04.2014. godine.

12. KONTROLA UTROŠKA POZAJMLJENIH SREDSTAVA

U svrhu kontrole utroška pozajmljenih sredstava, Ministarstvo će imenovati Komisiju za kontrolu namjenskog utroška sredstava Trajnog revolving fonda kod Union banke d.d. Sarajevo za dugoročno finansiranje nezavisno od Banke. Ova komisija vrši provjeru korištenja odobrenih sredstava obilaskom korisnika i njegovih poslovnih objekata, te uvidom u dokumentaciju na osnovu koje je ostvaren kredit.

Naprijed pomenuta komisija radi u skladu sa Programom i Javnim pozivom te svojim internim aktima i dužna je sačiniti Zapisnik o utrošku sredstava za svako privredno društvo u kojem je vršena kontrola utroška sredstava na lokaciji korisnika i isti, nakon svake kontrole, dostavljati Komisiji i federalnom ministru energije, rudarstva i industrije. Izvještaj o utrošku sredstava za 2016.godinu će se putem Ministarstva dostaviti Vladi Federacije Bosne i Hercegovine.

13. OBJAVLJIVANJE AKTA

Ministarstvo će ovaj Program, Odluku o usvajanju Programa i Odluku o izboru korisnika Programa utroška sredstava Trajnog revolving fonda kod Union banke d.d. Sarajevo, Federalnog ministarstva energije, rudarstva i industrije za dugoročno finansiranje projekata putem dodjele kredita za 2016. godinu, objaviti u „Službenim novinama Federacije BiH“ i na web stranici Ministarstva: www.fmeri.gov.ba

Ministarstvo će Javni poziv za kandidovanje Programa utroška sredstava Trajnog revolving fonda kod Union banke d.d. Sarajevo, Federalnog ministarstva energije, rudarstva i industrije za dugoročno finansiranje projekata putem dodjele kredita za 2016. godinu, objaviti u dnevnoj štampi „Večernji list“ i „Dnevni avaz“, te u „Službenim novinama Federacije BiH“, kao i na web stranici Ministarstva: www.fmeri.gov.ba

MINISTAR

Nermin Džindić